

DU

627.19

D66

BUHR A



a39015



01811726



0b





In Memory of
STEPHEN SPAULDING
1907 - 1925
CLASS of 1927
UNIVERSITY OF MICHIGAN

JV
627.19
1536

Correspondence
President Dole and
Minister Willis → 1893

DU
627.19
.D66

Hawaii

KE AU O HAWAII.

KUKA'I MANAO MAWAENA O

PERESIDENA DOLE

A ME

U. S. KUHINA WILLIS,

DEKEMABA, 1893.

Robert Grieco, Printer, Honolulu.

DZ
627.19
.D66

KA HOIKE PIIA A KE KUHINA WILLIS,

O KANA KOI KAULANA.

I KE AUPUNI KUIKAWA, E HAALELE I KO LAKOU KULANA AUPUNI A E HOIHOI AE IA LILUOKALANI.

E MR. PERESIDENA A ME NA KEONIMANA ?

Ua kaumaha nui ka manao o ka Peresidena o Amerika Huipua no ka hoohakalia ia o ka ninau pili ia Hawaii, aka nae, he mea keia i hiki ole ke alo ia ae.

A ua ulu nui mai no hoi ka hapanui o keia mabope iho o ko'u hiki ana mai nei, no kekahi mau kumu hana mua i makemake ia ai au e hana e a hooko ia, alaia, halawai aku au me oukou. Ua minamina pu no hoi ka Peresidena a pela pu no hoi me a'u, no ke ano malu o na hana i lawelawe ia ai na panai manao ana mawaena o ko kakou mau Aupuni a i elua. A ua hiki nae ia'u ke olelo ae, o keia mau hana malu i ikeia, ua lawelaweia ia no ka pono a me ka malu-hia o ko oukou poe kanaka a pau.

He makehewa wale no paha ia'u ke hoike e aku mamua, o na hana ana a ka Peresidena e pili ana i ka ninau Hawaii ua lawelawe ia ia mea malalo o ke ano alakai hooono a me ka hana i kupono e hanaia ; ua lilo kela hana i keia wa a pela no mai kinohi mai i mea kaokoa loa mai na manao kapae i ka pono, a huahua i kekahi a i kekahi, aka, me na manao wale no e kulike loa ana me na noho'na aloha i kukulu loihi ia me na hipuupuui kuikahi nana i awaiawala pili loa ko kakou mau aupuni pakahi.

Ua manao ka Peresidena he hana kupono nana e hana ai ka unuhi hou ana mai i ke Kuikahi Hoohui Aina E, a me na Agena o ko oukou Aupuni, mai ka Aha Senate mai, a e hooona mai i kekahi Luna Aupuni i hilina'i ia i Hawaii nei, nana e nieniele a e huli i ka oiaio me ka hoopilimeaa'i ole i na kumu o ko oukou hookahuli aupuni, a e imi noi aku a e hoike i ke kulana oiaio iloko o keia mau paeaina. Ua makemake ia keia mau moolelo i mea e hiki pono ai i ka Peresidena ke hooko pono i ka hana ana aku i kekahi hana nui ano makamae.

Ma na mea i ikeia a hookomo ia iloko o ka Mr. Blount Hoike, ua loa iho ia i ka Peresidena kekahi mau manao hooholo a ua paa

kā mānāo ma kekahi alāhele ana e hana ai a i ili mai hōi o kā'u hana ia e hoike aku ai ia oukou.

O ke Aupuni Kuikawa aole oia i kukuluia e na kanaka Hawaii, a aole hoi mamuli o ko lakou ae ana, a hooholo maikai ana, aole pu no oia i loomau ia mahope mai nei me ko lakou ae pono ana.

Ua hoole ka Moiwahine i ka haawi aku i kona mau mana Aupuni i ke Aupuni Kuikawa a hiki wale mai no i ka wa i maopopo ai iaia, ua ae a ike aku ke Kuhina o Amerika Huipuaia o lakou ka mana aupuni maoli e ku ana ia wa, a ua ae pu oia e kakoo aku me ka malama keakea ana ia lakou me na puali koa o Amerika Huipuaia, a o ka hoole ana aku he mea ia e mokuahana hookahe koke ai ma ia puali koa.

Ua ao ia aku oia a hooiaio pu ia aku e kona mau Kuhina a me na poe alakai pu hoi o ka poe lawelawe hookahuli i kona Aupuni ina oia e haawi ana malalo o na kumu keakea kua, alaila, e hoolohe ia aku ana mahope aku kona hihia ma ke ano hoopono e ka Peresidena o Amerika Huipuaia.

Mahope iho la ua haawi mai la ka Moiwahine i kona mau mana i na poe koa o Amerika Huipuaia i hoomoana ia ma ia wa ma Honolulu, ma kona hilinea ana maluna o ka manaoio maikai a hoopono o ka Peresidena mahope iho o kona lohe ana i na mea i hanaia, a na ka Peresidena e wehe hou ae i ka hana a kona Kuhina, a e hoihoi hou iaia me kona mau mana Aupuni ana e koi mai nei oia no ka Moi Kumukānawai o ko Hawaii Paeaina.

Mahope iho o na nana hoomanawanui ia ana o na hoike a Mr. Blount ua lawa i ka manao o ka Peresidena, o na hana i lawelawe ia e kua ana i ka Moiwahine, ina no aole i paipaiia, aka nae, ua kokua ia a kakoo ia ua hana la e ka Luna Nui o keia Aupuni e noho ana ma Honolulu; a ua haawi mua oia i kana ae hoopaa e kokua i kona mau enemī ma na hana e hookahuli ai i ke Aupuni Hawaii, a e kukulu hou mamuli o ka ikaika i Aupuni hou ma kona hakahaka, a ua hooko oia i kana ae hoopaa ma o ka kauoha ana e hoolohe ia kekahi mahale o na koa mailuna mai o ka Boston ma ka la 16th o Ianuari, 1893, a ma o ka ae a ike ana aku i ke Aupuni Kuikawa ma kekahi la ana ae, oia no nae, he nawaliwali loa ua Aupuni la me ka hiki ole ke malama iaia iho, a oia pu hoi ke Aupuni Kumukānawai e hiki loa ana ke kakoo me ka lanakila i kona mau mana ke kua ia mai e kekahi mana ikaika mawaho ae o ko Amerika Huipuaia mana kua i hoolele mua ia.

Nolaila, ua hooholo iho ka Peresidena aole loa oia e hoihoi hou aku iloko o ka Aha Senate i mea na lakou e noonoo ai i ke kuikahi ana i unuhi mai ai mailoko oia Aha ma ka la 9 o Maraki i hala. A mamuli o keia mau mea i noonooia, ua kauohaia mai au e ka Peresidena e apo aku i ka wa kupono hikiwawe e hoike aku i ka Moiwahine i keia mea i hooholoia a me kona mau manao i na hana koi-

kōi i ʻili mai maluna o ko makou Aupuni. Aka nae, ua komo no ka manao i ka Peresidena, mamuli no o ka makou komo pu ana e lawelawe i na hana i kinohi ua ʻili mai la maluna o makou ke koikoi o na hana a na poe a pau e noho ana iloko o Hawaii, a no ia mea hoi aole he hana pono ka hoolilo ana i kekahi aoao i mea e hiki ai ke hoopilikia ia e kekahi aoao. Nolaila, ua kauoha pu ia mai au ma ia manawa hookahi no e hoike aku i ka Moiwahine aia a hoihoi hou ia oia, e manao ana ka Peresidena e hana aku ana oia me ka naau hanohano kiekie ma o ka haawi ana aku i ka olelo kala-hewa piha i ka poe a pau i komo pu iloko o na hana kue iaia, me ke komo pu ana ma ia olelo kala-hewa o na poe e lawelawe ana a i noho a pili oihana a ano e ae paha me ke Aupuni Kuikawa, me ke kaili ole ae i kekahi o ko lakou mau pono a kuleana paha i noho ia e lakou manua ae o ka hookahuli Aupuni o Ianuari i hala aku, a o na hoai e pau i hana ia e ke Aupuni Kuikawa ma o ka lakou mau lawelawe hookele aupuni ana e aponoia ia mea.

Mamuli o ka hooko ana i na kauoha a ka Peresidena, ua loa mai iaʻu ka aelike a ka Moiwahine ma keia alahela, a ke waiho aku nei au i keia wa i kekahi palapala i kakauinoa ia eia, me na hoike, a o ke kope o ia mea kaʻu e waiho loa aku me oukou.

E heluhelu aku ana au i keia wa mai ka palapala kumu a e waiho aku ana au i kope i hooiaio ia me oukou:

“Owau, o Liliuokalani, mamuli o koʻu hoomaopopo ana i na ano kiekie o ka manao pono kaulike nana i kono ka Peresidena o Amerika Huipua, a me ka manao pu hoi e kapae ae i na manao hoomauhala a manao hoopai aku i ka hewa i hanaia mai a e hana pu hoi i ka mea pono no na poe a pau iloko o keia mau mukupuni, o ia pu hoi na Kanaka Hawaii a me na poe i hana mai na makua haole mai, nolaila, ma keia a maloko o keia ke kukala akea hooiaio aku nei au a ke hoopaa nei iaʻu iho ina au e hoihoi hou ia i Moi Kumukanawai no ko Hawaii Paeaina, e hoolaha kuahaua koke no au me ke kukala ana aole mau hana a mau kumu, a mau hana hookoe ma koʻu aoao no na kanaka a pau i hana maoli a kokua paha mawaho ae iloko o ka hookuhuli Aupuni o Ianuari 17, 1893, a e loa ia lakou he KALA piha no ka lakou mau hewa i hana ai me ka hoihoi ia aku ia lakou o ko lakou mau pono a kuleana malalo o ke Kumukanawai a me na Kanawai i hana ia e piliana ia mau hewa, a e papa a keakea no au i ka hooholo ia o kekahi mau hana e kukuhi ai i ke ano o ka hoopai a e hoopai ai paha no na mea i hana ia i ka wa i hala e ka poe nana i kukulu a i ole kakoo paha i ke Aupuni Kuikawa. A ke ae hooiaio hou nei au e lawe mai i koʻu hoihoi hou ia ana e noho malalo o ke Kumukanawai e ku ana i ka manawa o ka hookahuli Aupuni i olelo ia, a e noho no au a e hooko piha i ua Kumukanawai la me kona mau

hooiaio hoopaa e pili ana i na kuleana kino a me na waiwai i hoaka-ka ia ma ua Kumukanawai la.

“A ke hooiaio hoopaa hou aku nei au ia’u iho a me ko’u Aupuni ina e hoihoi hou ia e lawe a apono i na hoai e hanaia e ke Aupuni Kuikawa ma o ka lakou lawelawe ana ma ke ala kupono o na hana Aupuni, e hui pu ana hoi me na hoolilo Oihana Koa a me ka oihana makai; oiai o ka’u mea i manao ai, ina e hoihoi hou ia, e lawe mai e noho i ke Aupuni e like loa la me ia e kuana ma ka la i hookahuli kanawai ole ia ai.

“Hoike ko’u lima ma keia la 18th o Dekemaba 1893.

“LILIUOKALANI.

“Hoike:—J. O. CARTER.”

Ua lilo hou mai i hana na’u ka hai ana aku ia oe e ke Keonimana o ka mana hooko o ke Aupuni Kuikawa a me kou mau Kuhina, i ka mea i hooholo ia e ka Peresidena no keia ninau, a oukou hoi mamuli o ka oukou hana, a me ka ka Moiwahine i hooili ai maluna o’na, ua manao ia oukou e hookuu aku me ka hakalia ole nona i kona mau kuleana mana i haawiia e ke Kumukanawai.

A ano la, e Mr. Peresidena a me na Keonimana o ke Aupuni Kuikawa, mamuli o na noonoo hohonu ana i ke koikoi o na mea e pili ana i keia ano kulana, a me ka manao lana oiaio e hookomo ia mai ana iloko o ka oukou pane kela kulana kiekie o ka manao aloha aina nana e hoopoina i na iini pili kino ponoi iho, nolaila ma ka inoa a me ka mana o Amerika Huipua, ke waiho aku nei au imua o oukou i ka ninau:

E ae ana anei oukou e hooko malalo o ka olelo hooholo a ka Peresidena?

KA OLELO PANE A PERESIDENA DOLE,

HE HOOLE KEONIMANA ANA I KA PERESIDENA
CLEVELAND NOI.

HALE O KA MANA HOOKO,
Honolulu, Dek. 23, 1893.

ALOHA OE:--O ka palapala a ko'u hanohano o ka la 19 o Dekemaba, e hoike mai ana i ka manao i hooholo ia e ka Peresidena o Amerika Huipua mahope o kana noonoo ana i ke noi a keia Aupuni i kuikahi hoohui ma ke ano kalai Aupuni me kona Aupuni, a e hoakaka pu mai ana hoi i na mea pili i na hana kuloko pono i keia mau paeaina, ua lawe ae ke Aupuni e noonoo.

Oiai, me na manao hookuia kuhohonu makou e hoemaopopo nei ua hoole ia ka kela kumuhana waiwai nui a makou i waiho aku ai imua o ke Aupuni o Amerika Huipua, a i noonoo aponoia hoi e lakou i kinohi, eia no nae, ua loa mai ia makou ka maha ma o ko makou hoopomaikai ia ana mai e na lono pili oihana mua no keia kumuhana, akahi no a loa mai iloko iho nei o keia mau malama eiwa o ke kali ana.

Oiai makou e lawe mai ana i ka olelo hooholo a ka Peresidena o Amerika Huipua e hoole ana aole e noonoo hou aku i ke kumuhana hoohui aina ma ke ano o ka manao hooholo hope loa keia a ka poe Hooponopono Aupuni e noho nei i keia wa, aole no nae makou e hiki ana ke manao o ka huaolelo hope loa keia a ke Aupuni o Amerika e pili ana i keia kumuhana; no ka mea, o ka moolelo kuleana pili like mawaena o na Aupuni elua, o na hana hooikaikai a Amerika a me kona hapai ana i na mea e ulu ai na hoonauao Karistiano, a lilo ai i mea nana e kokua maopopo loa ka loa ana i keia aina o ke kulana hanohano iwaena o na aupuni kuokoa, o ke kulana ma ka palapala hoike honua o keia mau paeaina, a me ka mea ano nui loa i na Aupuni a i elua, oia hoi na kuleana kalepa pomai-kai like i ku loihi iho nei, huipu ae hoi me ko makou nawaliwali ma ke ano he Aupuni Alii, na mea nana e hoemaopopo loa mai ke kupo o ka hoohui ana ma ke ano kalaiaina o na Aupuni elua a ma ke ano pu hoi oia wale no ka hopena oiaio maoli ke nana aku i na kumu i hoikeia ae la.

Ua kokua nui ia keia manao io o na leo koikoi o na kalai aina o Amerika no kekahi manawa loihi loa, nana hoi i nana me ke apono i ka hoohui aina, a o ke kiekie iwaena o keia poe na inoa o W. L. Marcy, W. H. Seward, Hamilton Fish a me James G. Blaine, a he poe Kuhina mua o na Aina e wale no keia poe, a oi loa aku hoi ma keia kumu hana na poe o ke au hooponopono aupuni hope iho nei o oukou, ma o ka kukakuka ana me keia aupuni i kuikahi hoohui aina, me ka hoouua ana ia mea iloko o ka Aha Senate na lakou e apono mai.

Nolaila, e hoomau aku ana no makou i keia kumuhana hoohui kalai aina me Amerika Huipuaia ma ke ano o ka makou kumuhana hooponopono aupuni koikoi aku ana keia me na aina e, me ka maanolana hilina'i oiaio e papahi ia ana me ka lanakila ka makou noi, ina no aole i keia wa koke mahope aku no i hoomau loa ia aku ai na pomaikai like mawaena o na aupuni a i elua.

O na manao i pakui hou ia mai iloko o kau palapala e pili ana i ko makou noho'na kuloko pono'i me ka manao e lawelawe kuleana ole mai, he alaha'e hou keia iwaena o na kuleana hana o na aupuni a i elua. O kau mea i hoike mai nei ua manao ka Peresidena o Amerika Huipuaia i keia aupuni "e hookuee aku me ka hakalia ole nona (oia paha ka Moiwahine i hoopauia) i kona mau kuleana mana i haawiia e ke Kumukanawai," me ka ninau pu hoi, "e ae ana anei oukou e hooko malalo o ka olelo hooholo a ka Peresikena?" Ua hiki no ke pane ia aku keia me ka huaolelo hookahi, aka hoi, o ka puka ana mai o kekahi mau kumu iloko o kau palapala, a'u e ike nei he oiaio ole, a he mau hooholo kuhihewa ka i hookahua ia ma ia mau olelo, i lilo i mea kue mai i keia aupuni, nolaila, ua hiki ole ia'u ke hookuu aku i keia mau olelo e hele lanakila; aole no hoi o keia wale, aka, o ke ano koikoi pu kekahi a ano hooweliweli mai o na helehelena o ka manao i waiho ia mai nei, nolaila, i kupono ai ia'u ke paio aku me na wehewehe piha i na ninau i hoala ia mai e ia mau mea.

Aole o makou ae iki he mana kekahi o ka Peresidena o Amerika Huipuaia e komo wale mai ai e lawelawe kue iloko o ka makou mau hana kuloko pili pono'i. Aia wale no ka loa o ia mana iaia a na keia Aupuni ma kana hana e haawi aku, a ma ia mea hookahi wale no; a i ole ma ka hoopio ana mai paha i keia Aupuni.

Ua hoomaopopo iho au o keia ke kahua manao Amerika i hoo-puka pinepine ia i kela a me keia manawa e na waha mana o kou Aupuni.

Ua olelo o Peresidena Jackson ma kana olelo wehe i ka Ahaolelo o ka 1836: "O ke kulana hooponopono Aupuni rula paa a hana maa mau o Amerika Huipuaia oia ka hookaawale ana iaia iho mai ka komo wale ana e lawelawe kue iloko o na hoopapaa e pili ana ina hooponopono kuloko o na Aupuni e, a mahope aku ae apono a ike

aku paha i ka aoao e lanakila ana me ka hoomaopopo ole i na kumu i ala mai ai ka hoopaapaa i kinohi.

Ua hoomaopopo pono ia iho nei no na kumu alakai o na Kana-wai pili Aupuni iloko o na launa ana iho nei o na Aupuni elua iloko o na wa a pau i hala, a ua hoike hou ia mai no ma na olelo ao i haawiia mai e ke Kuhina Gresham ia Komisina Blount ma ka la 11 o Maraki, 1893, a na Blount hoi i hoolaha ae ma na nupepa ma Honolulu ma kana palapala pono i ka lehulehu o Honolulu. O na olelo o keia mau olelo ao au e hoike nei penei no ia:

“Aole o Amerika Huipua e olelo ana he mana kona e komo wale e lawelawe kue iloko o na hana kalai Aupuni a i ole hooponopono kuloko paha, a i ole iloko o na hana paonioni kuloko o ko Hawa Paeaina mawaho ae o na mea i hoakaka ia maloko nei (oia hoi e hoakaka ana ma ia wahi no ka malama ana i ka maluhia o ko Amerika poe kanaka), aole hoi no ka malama ana i kekahi kuikahi a pono e ae paha a lakou e paa nei.”

Aole no i haawiia ma na Kuikahi mawaena o na Aupuni a i elua kekahi mana e hiki ai ke komo mai e lawelawe kue wale.

Nolaila, e ka Kuhina maluna o ke kumu hea i hiki ai i ka Peresidena o Amerika Huipua ke hookahua iho i kona mana e komo mai ai e lawelawe kue mai? Aole mau hoakaka ma kau palapala no keia kumu koe wale iho no ma na wahi mea i hoakaka pokole ia ma keia mau huaolelo pohihihi: “Ua ao ia aku oia (ka Moiwahine i hoopauia) a hooiaio pu ia aku e kona mau Kuhina a me na poo alakai pu hoi o ka poe lawelawe hookahuli i kona Aupuni ina oia e haawi ana malalo o na kumu keakea kue, alaila, e hoolohe ia aku ana mahope aku kona hihia ma ke ano hoopono e ka Peresidena o Amerika Huipua.

Mahope iho la ua haawi mai la ka Moiwahine i kona mau mana i na poe koa o Amerika Huipua i hoomoana ia ma ia wa ma Honolulu, me kona hilinaia ana maluna o ka manaio maikai a hoopono o ka Peresidena, mahope iho o kona lohe ana i na mea i hanaia, a na ka Peresidena e wehe hou ae i ka hana a kona Kuhina, a e hoihoi hou iaia me kona mau mana Aupuni ana e koi mai nei oia no ka Moi Kumnukanawai o ko Hawaii Paeaina.” Eia hou “Ua lilo hou mai i hana na'u ka hai ana aku ia oe e ke keonimana o ka Mana Hooko o ke Aupuni Kuikawa, a me kou mau Kuhina i ka mea i hooholo ia e ka Peresidena no keia ninau, a oukou mamuli o ka oukou hana, a me ka ka Moiwahine i hooili ai maluna ona” (ka Peresidena o Amerika Huipua), a ua loa ka i ka Peresidena kona mau mana hooholo mai ka Komisina Blount hoike mai. A hiki mai la i keia wa aole loa i loa ia makou he wa kupono e hiki ai ke makaikai i keia hoike; aka, mai na wahi pauku lili i hoolaha ia ma na nupepa; a no kekahi mau kumu i hoike ia mahope aku nei,

aole makou i ae e waiho aku i ka make o Hawaii malalo o ia mata olelo hoakaka a manao hooholo.

Ma ka oiaio maoli no aohe lala o ka Mana Hooko o ke Aupuni Kuikawa i kamailio iki me ka Moiwahine i hoopauia, aole hoi ma ka olelo waha a ano e ae paha mai ka wa mai o ke kukala ia ana o ke Aupuni hou a hiki mai i keia manawa, koe wale no paha he hookahi a elua palapala a'u i hoouna aku iaia e pili ana i kona haalele i ka Halealii a e pili ana hoi i na koa kiai a ke Aupuni i ae mua ai nona, a me he mea la he mau mea hou ae no o ia ano like. Ua manao wale au o ke kamailio ana paha a Mr. Damon, oia i oia ma ia wa he lala no ka Papa Olelo ao, ka Mr. Blount i hoike ai ua olelo aku i ka Moiwahine i hoopauia ma ka la 17 o Ianuani, a i hoolaha ia ma na nupepa, a malaila iho la paha ke kahua o keia kuleana hoohikilele a ka Peresidena o Amerika Huipuaia i lawe ai i ka mana he hiki iaia ke hookolokolo mai i ko makou mau kuleana e noho aupuni ai. Ua ae ia o Mr. Damon ma ka manawa i oleloia ae nei, e hele pu me na Kuhina o ke Aupuni mua mahope iho o ko lakou halawai kuka ana me a'u a me ko'u mau hoa, e halawai me ka Moiwahine i hoopauia; ua hele wale no nae oia ma ke ano oihana ole, aohe mau kauoha i haawii iaia, a aole no he mana i loa iaia e hana ai ma ka inoa o ke Aupuni, a e hooiaio aku ai paha i ka Moiwahine i hoopauia, "Ina oia e haawi ana malalo o na kumu keakea kua, alaila, e hoolohe ia aku ana mahope aku kona hihia ma ke ano hoopono e ka Peresidena o Amerika Huipuaia."

Ua haawi ia aku ka makou olelo hope mamua iho i na lala o ka papa Kuhina i pau pu ai me ke Aupuni ma ko makou manawa i kamailio pu ai. O ka Mr. Damon mea i kamailio aku ai me ka Moiwahine i pau, ua olelo wale no oia nona pono iho, a aole no oia i hoike mai ia mea ia makou.

Ma ka Mr. Blount hoike o kana mau olelo ma ia wa, i loa mua mai ai i ke Aupuni ka ike no ke ano o kana mau olelo. Aka nae, ina no paha kakou e ae ana ua haawi io no ke Aupuni i ka mana e hooiaio aku pela, alaila, auhea "kana hihia" e hoolohe hoopono ia ai e ka Peresidena o Amerika Huipuaia mahope aku.

O ka ninau anei no kona mana e hookahuli ai i ke Kumukanawai o Hawaii a e kukala ai i Kumukanawai hou i kupono i kona make-make, a i ole no kona kuleana anei e hoihoi hou ia ai oia i ka noho. Alii, a i ole paha o kona kuleana anei e kua ana ia Amerika Huipuaia no na hana pono ole a ke Kuhina Stevens i oleloia ai, a i ole o keia mau kumu no anei a pau, a mailoko ae o keia e wae ae ai i ka mea i makemake ia.

Owai anei ka i hiki e pane i keia ninau?

Aka hoi, ina no o keia mau ninau a pau, a o kekahi paha o lakou, aole loa he mea moakaka e hiki ai i ka Peresidena o Amerika Huipuaia ke hooholo mai no ka pono o ke Aupuni Kuikawa i oi ae ma-

mua o kona ae a ike ana mai i keia Aupuni me na kaupalena ole a me ka ae ana i ko lakou mau Komisina i hoouna ia aku ai, a me ka hooponopono pu ana me lakou i kuikahi hoohui aina, ae ana e ike mai i kona Kuhina Nui, a me ka hoouna pu ana mai i elua mau Kuhina Nui mamua mai kahi a mahope aku kahi i keia Aupuni no; a ma keia manawa no nae aia ko ka Moiwahine (i hoopauia) Agena ma Wasinetona kahi i hooponopono ai nona e hiki pu ai iaia ke ike i ka oihana hana o na Aina E. O na hana a pau o keia Aupuni me ka Peresidena o Amerika Huipuaia ua hoakaka ia ma na palapala mawaena o na Aupuni a i elua a me na hana a me na hoakaka ana a ke Kuhina o keia Aupuni ma Wasinetona, a me na Komisina Hoohui Aina i hoouna ia aku ai ilaila.

Ina ua waiho aku makou i ko makou mau pono e noho Aupuni ai ia Amerika Huipuaia, alaila e ike ia ana ia mea ma kela mau palapala a ma na hana a ko makou kuhina a poe komisina hoi.

A he mea pono hoi e hoike ia kekahi aelike o ia ano i kahua e loaa ai ke kuleana i kou Aupuni e komo wale mai ai e keakea, a o ka noho ana mai ma ke ano Luna Kuikawa aia a mamuli o ka ae ana a na aoao elua ia mea.

Ua hoouna no ka Moiwahine (i hoopauia) i kona loio i Wasinetona e paio no kona kuleana e hoihoi hoi ia ai kona mana, a i nele ia mea, alaila, i haawina dala, a i ole, uku poho paha.

Aole no i ae ia ua loio nei e kau pu ma ka moku a keia Aupuni i hoouna ai i San Francisco me na Komisina Hoohui Aina a me ka lakou palapala elele.

Ua holo keia moku ma na la elua mahope mai o ke kukala ia ana o ke Aupuni hou, a ua haawi koke ia aku no ka hoole i ua loio nei mahope koke iho o ka loaa ana mai o ke noi no ia mea, ina no ma ka la i kukalaia ai paha ke Aupuni a i kekahi la mai paha. Ina hoi ha o ka manao ia e waiho ia aku ka ninau o ka hoihoi hou i ka Moiwahine (i hoopauia), heaha iho la ke kumu e hoole ia ai kona loio aole e kau ma keia moku?

Aole no he manao o ia ano, oia hoi, he aelike mawaena ona a me keia Aupuni e waiho i ka hana ma ke ano kuikawa i hoakakaia ma kana palapala ia Peresidena Harrison o ka la 18 o Ianuari, oia hoi ka la mahope mai o ke kukala ia ana o ke Aupuni hou. Penei na olelo o kana palapala:

“I KA MEA HANOHAHO BENJAMIN HARRISON,

“Peresidena o Amerika Huipuaia—

“*E kuu Hoatoha Kiewie a Maikai:*

“Me ka naau kaumaha kuhohonu au e palapala aku nei ia oe ma keia wa.

“O kekahi o ko'u mau makaainana, i kokua ia hoi e na kanaka o

na aina e, ua hoole i ko lakou noho'na malalo o'u, a ua kipi mai i na hooponopono aupuni Kumukanawai ana o ko'u aupuni.

"Ua hoao lakou e hoopau i ko'u noho alii ana a e kukulu i aupuni kuikawa, me ke kue maopopo no i na kanawai kumu o keia aupuni.

"A mahope iho nei o ka loa ana ia'u o na hooiaio hiki ole ke kanalua ia ua kokua a kakoo ka Mea Hanohano Kuhina Kiekie Mana Piha o Amerika Huipuia i ka lakou hana kue kanawai, a ua hoolele mai i na koa o Amerika Huipuia i uka o ka aina no ia mau hana, ua waiho aku au malalo o ko lakou ikaika, me ka manaoio aole la oia e hana pela ina aole me ka mana i loa mai iaia mai kona aupuni mai.

"He ekolu mau kumu nana i kono ia'u e hana pela: O ka makehewa o ka paonioni ana aku me Amerika Huipuia; o ka make-make e kapae ae i na hana ikaika, me ka hookahe koko a me ka hoopoino i ke ola a me ka waiwai, a o ka manaoio pu no hoi iloko o'u e hoihoi hou mai ana oe a me kou aupuni i ka pono ma kahi o ka hewa i hanaia mai nei maluna o makou.

"Iloko o ka wa kupuno e waiho ia aku ai imua ou kekahi moolelo hoakaka o na kumu oiaio e pili ana i keia hana, a ke noho nei au me ka manaolana e hooholo pololei a hoopono mai ana oe ma waena o'u a me ko'u mau enemī. Aole no keia hoopii i hanaia no'u pono iho, aka, no ko'u poe makaainana nana i noho iho nei me ka oluolu malalo o na noho'na lokomaikai, aloha a malama maluhia ana mai a Amerika Huipuia.

"Ua lawe aku nei ko'u mau hoa paio i kahi moku wale no e hiki ai ke loa ianei no keia hana, a no ko'u lobe ana e hoouna ana lakou i poe Elele o loko no o ko lakou heluna e waiho aku i ka lakou hoike o na mea i hanaia iho nei ma ko lakou aoao imua ou, nolaila, ua noi aku au i ko lakou oluolu e ae mai e hoouna pu aku au ma ia moku hookahi i Elele imua ou, nana hoi e waiho aku imua ou i ka'u mau hoakaka, e like la me na mea i maopopo ia'u a me ko'u poe makaainana i kupaa mahope o'u.

"Ua hoole ia mai keia noi, a no ia kumu ke noi aku nei au ia oe i keia wa ano i loa ai he pono kaulike no'u a me ko'u poe makaainana, aole ma ke hana mai o ke Aupuni o Amerika Huipuia i kekahi mea no keia hana a hiki i ka wa e lohe ai oe i ko'u aoao.

"E hiki ana ia'u ke hoouna aku i ko'u elele e aneane ana ma ka Ia 2 o Feberuari, oiai oia ana paha ka wa mua e loa ana ia'u kekahi moku holo aku, a e hiki aku ana oia imua ou me ka hikiwawe a pau e loa ana i mea e loa ole ai he hoohakalia ma na hooponopono ana o keia hana.

"Nolaila ke noi aku nei au ia oe, e kuu makamaka maikai, mai ae iki oe i kekahi mau manao hooholo e loa ia oe a hiki aku ko'u elele.

“A ke hooia aku nei au ia oe i ka hoomau ia o na manao mahalo kiekie.

LILIUOKALANI R.

“Honolulu, Ianuari 18, 1893.”

Nolaila, ina he mau mea kekahi i hooholo ia mawaena ona a me ke Aupuni e waiho i ka ninau o ka hoihoi hou ana iaia i ke Aupuni imua o Amerika Huipuia, ina la paha ua olelo ia ia manao i hooholoia ma keia palapala, no ka mea, aole e nele kona hoomaopopo ana aku i ka Peresidena ia kumu, oiai ua ike iho la oia ma ia manawa e hakalia loa ana kona loio alaila hiki aku i Wasinetona. Aka nae, aole loa he wahi huaolelo e hiki ai ke hoomaopopo he mea kahi i hooholo ia pela. Ua hoouna ke Aupuni i kona mau Komisina i Wasinetona no ke kumu nui hookahi, oia hoi i loa mai ke apono o ka Kuhina Stevens ae a ike ana i ke Aupuni hou, a e hooponopono ai hoi no ka hoohui kalaiaina ana me Amerika Huipuia. O ka palapala keakea a kue a ka Moiwahine (i pau) i hanaia ma ka 17 o Ianuari, ua like no laua me ka leta ana, ka nele i na olelo hooiaio ua loa iki he mau kuka a hooholo like ana e waiho i kona kuleana i ka noho Alii, imua o Amerika Huipuia. Aka, o ka manao oiaio maoli o kela palapala kue, he mau hoohalahala i na hana i hoakakaia a ke Kuhina Stevens a me ke Aupuni hou, a e hoike ana he hoopii kana imua o ke Aupuni o Amerika Huipuia. Ua lawe ia mai no ua palapala nei e like loa la me ka lawe ia ana mai ina no ma ka hale leta mai.

Ua kakau ia ka wa i loa mai ai ma ua palapala nei ma ke noi a ka mea nana i lawe mai, i mea hooiaio ua loa pono mai.

No ka hoolaha i waiho ia mai e ka Moiwahine (i pau) ua hoohalahala oia imua o Amerika Huipuia, aole kela i lilo i mea nui ia makou. Aole no e hiki i kela hoopii hoohalahala ke kaohi ia mai, oiai, e mau ana no ka oihana lawe leta e like me ka mea mau. Aka, o ka lilo ana o kela hoolaha ia ana mai a me ko makou lawe ana mai (me na olelo wehewehe ole) i kahua e hiki ai ke olelo ia ua waiho makou i ko makou kuleana e ku ai he aupuni ma ko Amerika Huipuia lima; aole loa i ala iki mai ia mea ia makou a hiki wale no i ka wa a kou Aupuni i waiho mai ai ia manao.

Penei ke ano o ua palapala kue nei:

“Owau, o Liliuokalani ma ka lokomaikai o ke Akua, a malalo o ke Kumukanawai o ke Aupuni Hawaii, ka Moiwahine, ke kue maopopo aku nei au ma keia i kekahi hana a me na hana no a pau e kue ana ia'u a me ke Aupuni Kumukanawai o ke Aupuni Hawaii i hana ia e kekahi poe kanaka e olelo ana ua hoala lakou i Aupuni Kuikawa no, a no keia Aupuni.

“A ke waiho a haawi aku nei au mamuli o ka ikaika i oi ae o Amerika Huipuia, nona ke Kuhina Mana Piha, ka mea hanohano John L. Stevens, nana hoi i kena na koa o Amerika Huipuia e hoo-

lele ia ma Honolulu a kukala ae e kokua ana oia i ua Aupuni Kuikawa nei i oleloia.

“A i mea hoi e kaohi ai i ka halawai kue ana o na puai koa a lilo paha ke ola, nolaila, malalo o keia palapala kue a me ke kena pu ia ana mai hoi e keia hana ikaika, ke haawi nei au i ko’u mana a hiki i ka wa a ke Aupuni o Amerika Huipua e wehe ai, mamuli o na kumu oiaio e waiho ia aku ai imua ona i ka hana a kona Luna Nui a e hoihoi hou ai ia’u iloko o na mana hooponopono ma ke ano owau ka Moi Kumukanawai o ko Hawaii Paeaina.

“Hanaia ma Honolulu, ma ka la 17 o Ianuari, A. D. 1893.

“LILIUOKALANI R.

“SAMUEL PARKER,

“Kuhina o na Aina E.

“W. H. CORNWELL,

“Kuhina Waiwai.

“JNO. F. COLBURN,

“Kuhina Kalaiaina.

“A. P. PETERSON,

“Loio Kuhina.

“S. B. Dole a me kekahi poe ae o lakou ka poe o ke Aupuni Kuikawa o ko Hawaii Paeaina.”

(Kakaukuaia). “Ua loa mai ma ka lima o ka Papa Kuhina i pau i keia la 17 o Ianuari, A. D. 1893.

“SANFORD B. DOLE,

“Luna Hoomalu o ka Aha Kuka Hooko o ke Aupuni Kuikawa.”

Malia paha aole i maopopo ia oe, aka, o ka oiaio nae keia, aole iki ma kekahi manawa a hiki wale mai nei no i ka wa au i waiho mai ai i ka olelo hookuleana a ka Peresidena o Amerika Huipua e olelo ana i kona mana e komo wale mai ai e keakea kue ma na hana pili kuloko o keia aina ma ka la 19 o Dekemaba, i loa mai he hoike pili oihana i keia Aupuni mai ke Aupuni mai o Amerika Huipua ua manao ia ma keia ala hele e hana ia ai. A aole no a hiki i ka wa i hoolaha ia ai ka Mr. Gresham palapala i ka Peresidena o Amerika Huipua e pili ana i ka ninua Hawaii, i loa iki ai he lono oiaio no kela ano kalai Aupuni.

O ka poe no mahope o ka Moiwahine (i pau) ua olelo lakou i kela a me keia manawa penei iho la ke ano e hanaia ai, “aole nae i hiki iki ia makou ke hilina i ka waiwai o ka lakou mau lono lauaha e pili ana i keia mea, oia e noho hilina maluhia ana makou mamuli o na kuleana pili Aupuni me kou Aupuni, a me ka hilina pu hoi i ke ano makamaka aloha a hoopono o ke Aupuni nona na hana ana

mē makou i ike pinepine ia kona ae ana i ko makou noho kuokoa aku ma ke ano mana alii, me ka hoao ole e kaili wale ae i kekahi pono mamuli o ka like ole o na ikaika mawaena o na Aupuni elua. Ina o kau kumu paiō mai ua manaōio o Peresidena Cleveland ua waiho aku keia Aupuni a me ka Moiwahine (i pau) i ko laua mau kuleana pakahi e pili ana i ka noho alii o keia Aupuni iloko o ka noho'na hookolokolo mai o Amerika Huipua a oia ka oiaio, alaila, e oluolu anei oe e ninau aku au, inahea nei a aia i hea kahi a ka Peresidena i malama ai i kana Aha Kuikawa?

Aole i loaā iki mai i keia Aupuni ka lohe no ka noho ana o kekahi Aha e like me ia, a aole no hoi he manawa i loaā mai e hiki ai ke waiho aku i na olelo hoike no kona mau pono. I na o na nie-niele ana iho nei a Mr. Blount kekahi hapa o na lawelawe ana a ia Aha, aole i ike keia Aupuni ia mea aole pu no hoi i hai ia mai ia mea; he oiaio, e like me ka'u i hai ae nei maluna, aole makou i ike, a hiki wale i ka wa i hoolaha ia ai ka ke Kuhina Gresham palapala i ka Peresidena Cleveland, i kela mau pule i hala aku nei, ua loaā i ka mana hooko Amerika he kahua kalai aupuni hoonioni kue mai ka noonoo ia ana.

A ina no i maopopo ia makou ua haawiia ka mana ia Mr. Blount i Komisina e lawe ai i na olelo hoike ma ka ninau e hoihoi hou ia ai ka Moiwahine (i pau), alaila, o ke ano o kana lawelawe ana ma kana aha ninaninau, e olelo aku au, aole i kupono no na imi ana o ia ano a no na imi ana no paha a pau e pili ana i ke kuleana o kekahi kino kanaka e hookolokolo ia ai. E like me ka lohe i loaā mai ia'u mai kahi e hiki ai ke hilina'i ia, ua wae oia i kana mau hoike a ua ninaninau ia lakou ma kahi malu e haawi hoolookoa ana i na ninau alakai, me ka haawi ole i kuleana e hiki ai ke ninau hooahuahualau ia, a i kekahi manawa me ka ae ole no e hoakaka mai na hoike e like me ka lakou mea i makemake ai no ka lakou olelo hoike i unuhiia mai e ia mailoko mai o lakou. He mea makehewa wale no paha ia'u ke olelo ae malalo o ia ano ninaninau, e lilo ana kekahi poe hoike i mea nawaliwali loa iloko o ka lima o kekahi loio akamai, a e kauo ia aku ai no hoi e olelo i kekahi mau mea e lilo ai i hapa-oiaio a ke ku hookahi iho ia olelo ike lilo i kumu e alakai hewa ai a e ano hoopunipuni ai no paha i ka nana aku. He hiki anei ke manaō aku, o na imi ana i hanaia e like me keia ano e loaā ana na olelo hoike ewaewa ole, piha a oiaio no ka hihia e ku nei?

He mea oiaio paha aole e hoolilo ia ana ka hopena o kekahi Aupuni i noho makamaka mai, oia hoi ina kakou e ae ana he mana io no i loaā e hookolokolo kuikawa ai, e hoopau wale ia mamuli o na ninaninau aoao hookahi wale no me ke ano malu a i hana pu ia hoi me ka ike ole o ua Aupuni la a me ka manawa ole i haawiia iaia e hoolohe ia ai, a i ole e ike ai paha owai la na hoike.

Ua hele mai o Mr. Blount i ne'i me ke ano malihini a ua hooma-

ka koke no e lawelawe i kana hana. Ua hoolilo oia i kona manawa i ka hana o ka hoakoakoa ana i na ike e haawiia aku ana, ma ka ninaninau ana i na hoike a me ka hoakoakoa pu ana i na papa hoike waiwai a me ka noho'na o keia aina a me na moololo palapala e ae, a ua hana oia me ka hooikaika a me ka mikiala, me ka haawi ana i kona manawa hoolookoa no ka hooko ana ia apana hana. He mau malama uuku wale no kona i noho iho ai, a iloko no o ia manawa ua paa mau kona manawa me keia hana a ua uuku ka manawa i loaa iaia e hiki ai ke ike i ke kulana maoli o na hana, a e loaa pono ai la mawaho mai ma o ka launa laula ana me na kanaka o ka aina a me na launa kamaaina pili kino ana me na ohana kanaka lehulehu me na oihana hoonaaauao a oihana mikiala i hoala ia. Ua ike wale no oia i ka aina mai kona hale noho aku e ku ana ma ke kikowaena o Honolulu, mai na maka aku ka hapa nui o na hoike ana i ninaninau ai.

Nolaila, malalo o keia mau helehelenā he mea maopopo anei e hiki ana i ke kanaka ina no i oi loa kona ikaika ma ka imi ana ke hana i mau olelo hoike e hiki ai ke hilinai pololei ia i kahua no kekahi olelo hoololo ma ka nināu pili i ke kulana o kekahi aupuni? Nolaila, mamuli o ka nana ana i na kumu oiaio a pau e pili ana i ka nināu no ka mana o ka Peresidena e komo mai ai e lawelawe kue mai, a i pili pu hoi ma keia hana na lala o ka Mana Hooko, ka poe hoi i lawelawe hana maoli a lilo i poe hoike i ike maka, no ia kumu ua hiki ia'u ke hooiaio aku i Kou Hanohano aole mamuli o kekahi hana a keia aupuni ma ka la 17 o Ianuari i hala aku la, aole hoi mahope mai nei, i loaa ai i ka Peresidena o Amerika Huipuaia he mana e komo mai ai e lawelawe kue iloko o na hana kuloko o keia aina, ina no ma na hana i ikeia a hoopukaia paha e keia aupuni me ia ka mana.

Ua hoike ae oe ma kau palapala "mahope iho o na nana hoomanawanui ia ana o na hoike a Mr. Blount ua lawa i ka mana o ka Peresidena, o na hana i lawelawe ia e kue ana i ka Moiwahine, ina no aole i paipai ia, aka nae, ua kokua ia a kakoo ia ua hana la e ka Luna Nui o keia Aupuni e noho ana ma Honolulu; a ua haawi mua oia i kana ae hoopaa e kokua i kona mau enemi ma na hana e hookahuli ai i ke Aupuni Hawaii, a e kukulu hou mamuli o ka ikaika i Aupuni hou ma kona hakahaka, a ua hooko oia i kana ae hoopaa ma o ke kauoha ana e hoolēle ia kekahi mahēle o na koa mailuna mai o ka Bosetona ma ka la 16 o Ianuari, 1893, a ma o ka ae a ike ana aku i ke Aupuni Kuikawa ma kekahi la ana ae, oia no nae he nawaliwali loa ua Aupuni la me ka hiki ole ke malama iaia iho, a oia pu hoi ke Aupuni Kumukanawai e hiki loa ana ke kakoo me ka lanakila i kona mau mana ke kue ia mai e kekahi mana ikaika mawaho ae o ko Amerika Huipuaia mana kaa i hoolēle mua ia."

Me ka komo ole aku e hoopaa i keia mau kumau, eia kau pane, ua

hiki ole ia'u ke hoomaopopo i ka pololei o ka Mr. Blount ho'ike, i loa ai i ka Peresidena na kahua o kana hooholo, oiai aole manawa i loa ai ia'u e makaikai ai i kana hoike. Aka, ke makemake nei au e hoole pololei aku me ka leo ikaika i ka oiaio o na kumu pakahi a me na kumu no a pau i hoike ia iloko o ka olelo hoakaka maluna ae la; aka nae, oiai hoi ua loa iho la i ka Peresidena ka mana o paa iloko o kona naau no keia mea, e kamailio aku ana au mai kana kahua paio mai.

Ma ke ano pokole eia maoli ko'u kahua: Ina na na koa Amerika i kokua kanawai ole ka poe hookahuli Aupuni ma ke kukulu ana i ke Aupuni Kuikawa, alaila, aole maluna o keia Aupuni ke koikoi o ka lakou hana hewa ana.

He hana pono maoli ia e pili ana i ka hoopai aku no na hana kua mawaena o ke Aupuni o Amerika Huipuia a me kona mau Luna Aupuni.

Ke olelo nei au, aole loa he mau kumu alakai mua ma na kanawai mawaena o na Aupuni no kela kahua mana mamuli o ia mea i hanaia e na koa Amerika, alaila, ua ili aku la maluna o Amerika Huipuia ka mana maluna o na hana kuloko o keia Aupuni. Ina no he oiaio, e like me kau i olelo mai nei, ua hana ke Aupuni Amerika i ka mea e ili aku ai ke koikoi o ka ka Moiwahine koi maluna ona, a i hoakakaia hoi, ua lilo kona nohoalii mamuli o ia hana, alaila, aole ia he mea na'u e hoopapaa aku ai, koe wale no o ka olelo aku ina pela ka oiaio, he hana ia mawaena o ke Aupuni Amerika a me ia e hooponopono ai mawaena o laua iho: A o keia Aupuni hoi, i ae a ike ia mai kona mana alii, a i like hoi o kona mau mana me ke Aupuni o Amerika Huipuia a e noho ana hoi malalo o na kuleana mana noho Aupuni me ua Aupuni la, aole loa e hiki ke hoopau wale ia mamuli o kona hookaa ana i kona mau aie i ka Moiwahine (i pau). Nalaila, maluna o keia mau kahua, e Mr. Kuhina, ma ka aoao o ko'u Aupuni, ke keakea kua aku nei au me ka mahalo i ka pakaha wale ia mai o kona mau mana e like la me na olelo o kau palapala. He mea paakiki no i ka malihini e like la me oe, a o ka oi loa hoi no ka Peresidena o Amerika Huipuia me na hana nui e paa ai ka manawa i ili maluna ona, me na hana koikoi e hooke mau ana iaia a me kona kamaaina ole i ke ano noho'na a me ka moolelo o keia aina a me ka noho ana kuloko o keia lahui kanaka, ke ike maopopo i ke kulana maoli o na hana a ke hoomaopopo hoi i na au o ka noho'na ohana, i na mana pili lahui na hana i maa mau a me na manaio kahiko, e kokua ana a pau i na helehelena kalaiaina kuwaho.

O makou hoi o ka poe i ulu ae a nunui maanei a i hookama hoi i keia aina i mau home no makou, ua ike maopopo loa makou i ka paakiki o ka malama ana i aupuni kahua paa maanei.

© kekahi anaina kanaka i mahelohelo ia mailoko mai o elima la-

hui, a o ka hapa nui hoi o ia poe he ike powehiwehi wale no i ka io a me ka waiwai o na oihana hana kupono i ka hoikeikeia, ke haawi mai nei i na ninau kalaiaina e puhili ai ka naauao o ka poe kalaiaina maa mau loa ma ia mea.

No kekahi mau makahiki loihi i hala ae ua hoomaopopoia me na manao kaumaha kuhohonu e kekahi hapa nui a poe koikoi o keia lahui kanaka, oia hoi he poe haole a me na kanaka Hawaii pu no, ke ano hoi hope o na hana a ke Aupuni Alii o Hawaii, a ua hoao lakou ma ke ano hanahano e keakea ia mau mea, a ua hoao hoi maloko aku o na Ahaolelo, na nupepa, a ma ke noi kino maoli ana a me na hooikaika ana iwaena o ka poe hilineia e kokua a e puana me ka leo ikaika i na hehelena kupono e hoikeikeia ai ke Aupuni Alii, a e hoala i na mea e makemake mai ai ka lehulehu, a e pale ae ai hoi i ka auhulihia i ke maopopoia e hiki mai ana ina e kaohi ole ia ua mau hana la. Ua lilo nae keia mau hooikaika ana i mea paio hoonaukiuki ia mai e na 'lii elua i hala ae nei.

Ma ia manawa mai ua lilo ae la keia mau hana paio i kumu hana maopopo mawaena o ka mana Alii a me ka mana Aupuni Makaainana, a me kawaawa kiekie loa nae me ka akahale ole i alakai ia na hana malalo o ka mana Alii. O ka kuleana i ae ia i ka Moikane e hoopae mai ai i kana waiwai e kauoha ai no kona pono pono me ka uku ole i na dute, ua kue ia ma o ka ae ia ana mai e komo na huina rama nunui i mea e hoohaunia ai i ka poe koho balota. Ua kokua oia i ke koho ia ana o na Luna Aupuni, o ka mana hooko a me ka mana hookolokolo pu no, i ka Ahaolelo, a ua hookohu laula ia ma na oihana na poe hoa i kohoia no ia hale. Ma ka Ahaolelo o ka 1886, owau kekahi hoa ma ia kau, a o ka aoao e kokua ana i ke Aupuni aia ia lakou ka hapa nui, a he aneane o na hoa a pau ma ia hapa nui he poe wale no e paa ana i na oihana mai ke Aupuni, a o kekahi poe o lakou me he la elua a ekolu oihana, a ma ia mea e hookomo maopopo ana i ka mana Ahaolelo o ke Aupuni malalo o ka mana pono i ka koakoa hoi o ka Moikane.

Na na hana kue kumukanawai, na uha-ai kanawai ole, a me na hana hoohilahila akea o ke kuai ana i na pono oihana me na pomai-kai i ka mea oi o ke koho ana mai ia Kalakaua aku na kumu i hiki mai ai o ka hookahuli Aupuni o ka 1887, a i loa pu mai hoi o na apono piha a manao kokua mai na luna aupuni nui mai a pau ma Honolulu, i huipua me Kuhina Merrill, a oia no hoi ke Kuhina a Peresidena Cleveland maanei ia wa. O kela hookahuli aupuni ana nae aole ia he hana i manaia no ka hoohui aina, aka, no ka manao i Republica Kuokoa, aka hoi, i ka wa i paa ai ke Aupuni Alii iloko o ko lakou lima, ua lanakila ae na waha olelo kokua e kaohi iloko o ka Aha Kukakuka, a ua ae hou ia aku he hoolimalima no ka wa ole i ua oihana la malalo nae o na kumu e hooko pololei ke Alii i ka Kumukanawai hou i hoolahia ae no ma ia manawa nana hoi i

hoemi nui na mana o ka Moi. Aole no nae o Kalakaua i hooko pono i keia aelike a ua hoao ma na ano a pau e hiki ana e alo ae i na mea i hoakaka ia. O ka hoala kipi o ka 1889, ua imo ia no e kona mau maka, a ua papa ia na kiai o ka Halealii e noho ana malalo o kona mana aole i kinai i ua hana la. O ke kaikuahine alii Liliuokalani kekahi i komo like ka manao me ua hana la, oia no kekahi hoa iloko o ia hana, a nana i haawi kekahi hale noho ona mawaho o ke kulanakauhale i wahi hui no ua poe kipi nei. Malaila na hana i hoolala ia ai a mailaila mai ke kai huakai ana o ka poe kipi e kaula mai i ke Aupuni.

Ua hoopio koke ia no ua hana la iloko o kekahi mau hora uuku o ka hakaka ana, me ka lilo no nae o kekahi mau ola ma ka aoao o ka poe kipi, e ka poe no nana i lawelawe a holopono ka hookahuli vupuni o 1889.

A o ka noho aupuni ana iho nei o ka Moiwahine (i pau) he oi aku no ka akahale ole a me ke ano hoihope mamua ae o ko ka kiau-kunane. O ka emi ana mai o kona maamaalea mamua ae o ke kiau-kunane, a me ka emi ana mai o kona ike ma ka lawelawe ana i na hana, ua oi aku nae kona hoopaaakiki, a ua like no ka hiki ole ke hilinaia ia a me ka nele i na kahua hoopono. Ma kona nanaina ua hooihiki hookaulua ole wale no oia i ka hooihiki pili oihana e noho hooponopono mai e like me ke Kumukanawai, a me he la me ka manao wale no he wahi hana ano rula, me kona hoomaka koke no, e like me kana olelo hoike ia Mr. Blount, e noonoo i na hana e hoopau ai i ua Kumukanawai nei, a e pani mai ai ma kona wahi i Kumukanawai i hanaia eia pono. Me ia manao like hoomaopopo ole no i na mana o ia kanawai, ua hoao oia ma na ano hooikaika e alakai i na hookohu oihana ana a pau, o ka mana hooko a mana hookolokolo pu hoi. O ke Kau Ahaolelo o ka 1892 ka oi aku o ke kau loihi i ikeia iloko o ko makou moolelo, a i hoikeia hoi ma ia kau na paonioni ikaika ana e kaa ka mana alakai aupuni a me ka ahaolelo malalo o ka mana pili kino o ka Moiwahine; ua kaohi ikaikaia keia mea e ka aoao kue.

Iloko o keia mau paio ana eha papa kuhina i kohoia a noho a hoopauia, a o ka bila ae lotere, i unuhiia aku ma na la mua no o ke kau no ka nele i ka poe nana e kokua, ua lawe hou ia mai ma ka wa hope loa o ke kau, i ka wa a ka aoao kue e nawaliwali ana ma o ka kaawale ana o kekahi o kona mau hoa, a lawe hou ia mai a hooholoia, malalo o na hana pono ole a kue kanawai maluna o na hoa ahaolelo, a iloko pu hoi o ia mau hana he mau noi pono i na ka Moiwahine ia lakou.

O ka Aha Kuhina hoi e noho ana ma ka aoao o ka poe kue a me ka hapanui o ka Ahaolelo, he poe i hookohuia e ka Moiwahine mamuli o kona kena ia ana, ua hoopauia ae lakou ma ia mau ano hana

like, a me kekahi Aha Kuhina hou a kona makemake iho, i hookuu ia ai ka Ahaolelo.

O keia bila ae lotere ua like no kona ano me na oihana like i kipaku ia mai mailoko o na mokuaina a pau o Amerika Huipua e na manao hoonaukiuki o ka lehulehu.

Ina i paa kona kukulu ia ana maanei, alaila, he wahi manawa pokole wale no ua pau loa na mana lokomaikai o ke Aupuni i ke kaa iloko o ko lakou lima, a e hoohaumia pu ia ai hoi ka noho'na ohana, kalaiaina, a me ke ola o keia lahui. Oiai no nae ua lilo i mea e hookuia ai ka manaolana o ka lehulehu no ke kulana o ka aina i ka wa i pau ae ai o ka Ahaolelo, eia no nae ua lawe ia mai no ia mea me ka manao ole e hana i kahi mea mawaho ae o ke ano kanawai. Aka nae, ukali koke ia mai la mahope na hana hoao a ka Moiwahine e onou koke mai i kana kahua kalaiaina, a holo kona mau Kuhina, no ka hooweliweli ia me na hana ikaika imua o na makaainana e kokua a malama mai; aia iho la ma ia manawa i hana ia ai ka hoala kue i ka Moiwahine, a ma kela a me keia la i hoakoa-koa ia mai ai ka ikaika, a o ka hopena i puka mai ua kukala ia ke Aupuni Kuikawa a hoopau loa ia ke Aupuni Moi ma ke kolu o ka la mahope mai.

Aole e hiki i kekahi kanaka ke olelo pololei i hoopauia ka Moiwahine e na koa o Amerika. Na ka poe e hoike ana ma ka aoao a me ka manao o ka lehulehu, a i hoomahuahua ia mai i keia wa, na lakou i hana ka hookahuli aupuni, a na ia poe no i pelu na kuli o ka Aupuni Alii ma ka 1887; a nana pu no i hoopau ka hoala kipi o 1889, ka poe hoi iloko iho nei o keia mau makahiki he iwakalua i kaula mau iho nei e loa he Aupuni i hoike ia e na makaainana ma keia aina, ina no aole na koa o Amerika, e hookahuli ia ana no ke Aupuni, no ka mea, o na kumu o ia mea i hana ia ai, aole i pili i ko lakou hiki ana mai. Nohaila, owau, mamuli o ke aloha makamaka a pau i ke Aupuni o Amerika Huipua au hoi e noho Kuhina mai nei, a me ka makemake pu hoi e hanai hoomau aku i ka manao maikai o ka lahui kiekie o Amerika, ke waiho aku nei i ka pane a ko'u Aupuni no kau kumu manao i waiho mai nei, me ke noi pu aku e hoouna aku oe ia mea i ka Peresidena o Amerika Huipua no kana noonoo ana.


Oiai, no ke Aupuni Kuikawa he kaawale loa mai ka lilo ana he "aupuni ikaika," a e hiki ole ai hoi ke paonioni loihi aku me na koa o Amerika Huipua ma ke ano kaula, eia nae, ua manao makou he kulana hiki ole ke wawahia malalo o na kahua alakai mua a pau o ke kanawai, a malalo pu hoi o na kahua hooponopono pili aupuni a pau a imua pu hoi o ka aha hoopono o ka luna ike hala. Aole a makou hewa i hana aku ai i kou Aupuni; aobe hewa hahaki rula e hiki ke koi ia maluna o makou. O ka makou kumuhana wale no me ko oukou lahui, oia wale no keia, no ko makou mahalo kiekie i ko oukou


mau oihana kuokoa o ka noho ana, ua iini nui makou e pahola like ia mai ia pono iloko o ko makou wahi aina kupikipikio, a no ko makou aloha pu i kona hae, a me ka manao o kona welo ana mai imua o ko makou alo me kona ano lokomaikai a mana nui he mea ia e oi aku ai ka pomaikai no na pono a pau o ko makou poe kanaka, ua ku makaukau iho nei makou e pakui aku i ko makou aina, i hooku hou no kona nani, a i kumu e hooko ia ai ka hoohui ana aku a makou hoi i manaoio ai he pomaikai pu no hoi no kou aina, a pela hoi no ko makou.

Ina keia he hewa, alaila, e ae aku ana makou i ko makou hewa.

Ua kauoha ia mai au e Mr. Kuhina e hoike aku ia oe, me ka mahalo ke Aupuni Kuikawa e hoole hookaulua ole aku nei i ke kumumanao a ka Peresidena o Amerika Huipuia e hoihoi aku i kona mana Aupuni i ka Moiwahine (i pau).

Ua hanaia keia olelo pane aole wale no mamuli o na kumu i hoike ia maluna, aka, mamuli pu hoi o ko makou ike i ka makou hana a kupaa oiaio mahope o na kanaka koa wiwo ole nona mai na hookohu a makou e paa nei, ka poe hoi i kupaa oiaio me makou iloko o na hora o ka wa e hoao ia ai ke kanaka nona mai hoi na kauoha a me na makemake a makou e ae wale ai no he mana ma keia honua. Aole e hiki ia makou ke kumakaia i ka waiwai laahia a lakou i waiho mai ai iloko o ko makou lima, he waiwai nana i hoike na kahua hoonaaauao Karistiano no ka pono a pomaikai o na kanaka a pau o keia Paeaina.






FILMED 1983

THE UNIVERSITY OF MICHIGAN

DATE DUE



JUL 9 9 1983

BOUND

DEC 11 1934

**UNIV. OF MICH.
LIBRARY**

UNIVERSITY OF MICHIGAN



3 9015 04878 4501

